

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 गुरुवार

दिनांक 24.07.2025

प्रमुख समाचार –

- 1— प्रदेश के बीजापुर, कांकेर, दंतेवाड़ा, नारायणपुर अउ सुकमा जिला म आज दू करोड़ सत्ताईस लाख रुपिया ले जादा के छैसठ झिन इनामी माओवादी मन ह पुलिस के आगू करीन आत्मसमर्पण।
- 2— प्रदेश के किसान मनके परब तिहार हरेली आज प्रदेश म उछाह के संग मनाय जात हे— ऐति पाटजात्रा विधान के संग पचहत्तर दिन तक चलइया बस्तर दसहरा आज ले होंगे सुरू।
- 3— एक ठिन निम्नदाब के क्षेत्र उत्तर बंगाल के खाड़ी के उपर बने अउ संगेसंग उपरी हवा के चक्रवाती घेरा बने के सेति प्रदेश के कतकोन जघा म काली हो सकथे भारी बरसा।

अब समाचार विस्तार ले

माओवादी—आत्मसमर्पण—01

प्रदेश के बीजापुर, कांकेर, दंतेवाड़ा, नारायणपुर अउ सुकमा जिला म आज दू करोड़ सत्ताईस लाख रुपिया ले जादा के छैसठ झिन इनामी माओवादी मन ह पुलिस के आगू आत्मसमर्पण करे हे। बीजापुर जिला म पच्चीस झिन माओवादी मन ह बस्तर पुलिस महानिरीक्षक पी.सुंदरराज, अतिरिक्त पुलिस महानिरीक्षक कमलोचन कश्यप अउ पुलिस अधीक्षक जितेन्द्र यादव के आगू आत्मसमर्पण कर लीन हे। ए माओवादी मन उपर एक करोड़ पंद्रह लाख रुपिया के इनाम घोसित रिहीस। आत्मसमर्पण करइया माओवादी मन म ओडिसा म सक्रिय माओवादी नेता रमन्ना, नेशनल पार्क एरिया कमेटी के सदस्य सुखू अउ कमलू के संगेसंग बड़का कैडर के माओवादी सामिल हवय।

उहें, दंतेवाड़ा जिला म घलो लोन वर्गटू अभियान ले परभावित होके पंद्रह झिन माओवादी मन ह आत्मसमर्पण करे हे, जेमा ले पांच झिन माओवादी मन उपर सत्रह लाख रुपिया के इनाम घोसित रिहीस। आत्मसमर्पण करइया माओवादी मन म एक झिन दंपति घलो सामिल हे। ए माओवादी मन ह करीबन बीस बछर ले माओवादी संगठन म सक्रिय रिहीन। एखर मन उपर कतकोन घटना म सामिल रहे के आरोप हे।

ओति, कांकेर जिला म माओवादी मनके मीलिट्री कंपनी नंबर एक के कमांडर के संगेसंग तेरह झिन इनामी माओवादी मन ह आत्मसमर्पण करे हे। ए जम्मों झिन मन उपर बैसठ लाख रुपिय के इनाम घोसित रिहीस। ए जम्मों माओवादी मन कांकेर जिला के रावघाट—परतापुर एरिया कमेटी अउ माड़ डिवीजन म सक्रिय रिहीन।

माओवादी—आत्मसमर्पण—02

उहें, नारायणपुर जिला म आज कुल तैंतीस लाख रुपिया के इनामी आठ झिन माओवादी मन ह आत्मसमर्पण करे हे, जेमा पीएलजीए बटालियन के प्लाटून—वन अउ प्लाटून—सिक्सटीन के पांच झिन माओवादी सामिल हे। हथियार बनइया टीम के कमांडर मुकेश अउ ओखर संगवारी मन ह घलो आत्मसमर्पण करे हे। आत्मसमर्पण करइया माओवादी मन म चार झिन माईलोगिन घलो सामिल हे।

ऐति, सुकमा जिला म सरकार के पुनर्वास नीति ले परभावित होके पांच झिन माओवादी मन ह आत्मसमर्पण करे हे। ए जम्मों झिन जगरगुंडा अउ चिंतलनार जघा म सक्रिय रिहीन।

आत्मसमर्पण करइया जम्मों माओवादी मन ल पचास-पचास हजार रुपिया के प्रोत्साहन रासि दे गीस। ए जम्मों मन ल राज्य शासन के पुनर्वास नीति के फायदा दे जाही।

आरटीई-लॉटरी

स्कूल शिक्षा विभाग ह चालू शैक्षणिक बछर बर शिक्षा के अधिकार अधिनियम आरटीई के तहत पढ़इया छात्र मनके सीट के आबंटन अउ दूसर दउर के लॉटरी के तारीख ल बढ़ा देहे। पहिली लॉटरी अउ सीट बांटे के काम बाईस ले अउ तेइस जुलाई के होना रिहीस, फेर अब लॉटरी इक्तीस जुलाई के होही। त, उन्हें प्रवेश के काम इक्तीस जुलाई ले दस अगस्त तक होही।

किसान-नैनो डीएपी

चालू खरीफ मौसम म खेती-किसानी बर ठोस डीएपी खातू के कमी ल पूरा करे बर राज्य सरकार डहार ले वैकल्पिक खातू के पूरा बेवस्था करे गेहे। राज्य सरकार ह चालू खरीफ मौसम म रासायनिक खातू के निर्धारित लक्ष्य ले अभी तक चौरानवे प्रतिसत खातू के भंडारण कर लेहे। एखर संगेसंग जमा खातू ले सत्तर प्रतिसत खातू बांटेन। राज्य म यूरिया, एनपीके, पोटाश, सुपरफास्फेट जइसन रासायनिक खातू परयाप्त मात्रा म उपलब्ध हे अउ किसान मन ल ओखर मांग के अनुसार सरकारी समिति मन ले सरलग मिलत हे।

नैनो डीएपी के परयोग ले किसान मन ल प्रति एकड़ धान के फसल म करीबन पचहत्तर रुपिया के सोज्झे फायदा होवत हे। कृषि विसेसज्ञ के मुताबिक धान के एक एकड़ के फसल बर जरूरी पचास किलोग्राम ठोस डीएपी खातू के जघा म सिरिफ पच्चीस किलोग्राम ठोस डीएपी अउ आधा लीटर नैनो डीएपी के एक बोटल परयाप्त हवय। नैनो डीएपी के परयोग बर किसान मन ल जानबा दे गेहे। ओमन ल डेमो देखाके एखर बारे म बताय जात हे। राज्य सरकार ह नैनो डीएपी के परयोग ल लेके किसान मनके बीच जागरूकता अभियान चलावत हे। कृषि विभाग के मैदानी अमला, कृषि विज्ञान केंद्र के वैज्ञानिक अउ प्रगतिशील किसान के मदद ले खेत मन म ठोस डीएपी के संग नैनो डीएपी के घलो परयोग के विधि किसान मन ल बताय जात हे।

हरेली

छत्तीसगढ़ के लोक परब तिहार हरेली आज प्रदेश म उछाह के संग मनाय जात हे। सावन महिना के अमावस के दिन मनाय जाय हरेली तिहार म किसान मन ह अपन कुल देवता अउ खेती-किसानी म परयोग करे जाय, औजार मनके पूजापाठ करथे, अउ संगेसंग लइका, जवान मन ह गेड़ी बनाके ओमा चढ़े के मजा लेथे। रईपुर स्थित मुख्यमंत्री निवास कार्यालय म घलो हरेली तिहार के कारीकरम राखे गीस। ए मउका म मुख्यमंत्री विष्णुदेव साय ह आज मुख्यमंत्री निवास म गौरी गणेश अउ नवग्रह के पूजा करके भगवान शिव के अभिषेक करीन। संगेसंग नांगर, रापा, कुदारी अउ आने कृषि यंत्र मनके पूजापाठ करके हरेली उत्सव के सुभारंभ करीन। ए मउका म मुख्यमंत्री ह प्रदेश के जम्मों लोगन मनके खुसहाली अउ सुख-समृद्धि के कामना करीन।

उहें उप मुख्यमंत्री अरुण साव के नवा रईपुर स्थित शासकीय निवास म आज बिहनिया ले हरेली के उछाह रिहीस। प्रदेश के जम्मों जिला मन म घलो हरेली तिहार उछाह के संग मनाय के समाचार मिले हे।

बस्तर दशहरा

हरेली अमावस के मउका म आज बस्तर के आराध्य देवी मां दंतेश्वरी मंदिर के आगू आज पाटजात्रा पूजा विधान के संगेसंग पचहत्तर दिन तक चलइया विश्व प्रसिद्ध बस्तर-दशहरा परब सुरू हो गेहे। बस्तर दसहरा परब के पहिली पूजा विधान म बस्तर सांसद अउ बस्तर दसहरा समिति अध्यक्ष महेश कश्यप, जगदलपुर विधायक किरन सिंह देव के संगेसंग आने-आने जन प्रतिनिधि अउ बस्तर दसहरा परब समिति के पारंपरिक सदस्य मांझी-चालकी, पुजारी, पटेल अउ सेवादर मनके संगेसंग बड़ संख्या म लोगन मन सामिल होइन। बस्तर दसहरा परब

के पहिली पूजा विधान पाटजात्रा म रथ बनाय बर औजार दुरलू खोटला अउ आने औजार मनके परंपरागत ढंग ले पूजा-पाठ के रसम पूरा करे गीस।

कृषि-प्रशिक्षण कार्यशाला

इंदिरा गांधी कृषि विश्वविद्यालय म होय तीन दिन के क्षमता विकास प्रशिक्षण कार्यशाला काली सिरागे। कृषि वैज्ञानिक अउ प्रसार कार्यकर्ता मन बर होय ए कार्यशाला म प्रतिभागी मन ल संवाद कौशल, संभाषण कौशल अउ प्रस्तुतीकरण कौशल विकास के संगेसंग ग्राफिक डिजाइनिंग, पावर पाइंट प्रेजेंटेशन बनाय, वीडियो प्रोडक्शन तकनीक, खेती म आर्टिफिसियल इंटेलिजेंस के परयोग के बारे म प्रशिक्षण दे गीस। समारोह ल संबोधित करत इंदिरा गांधी कृषि विश्वविद्यालय के कुलपति डॉक्टर गिरिश चंदेल ह किहीन कि खेती म आर्टिफिसियल इंटेलिजेंस के बाढ़त महत्ता ल देखत कृषि वैज्ञानिक अउ प्रसार कार्यकर्ता मन बर खेती म आर्टिफिसियल इंटेलिजेंस के परयोग के बारे म जानना बहुते जरूरी हे।

मौसम

अउ अब पेस हे मौसम के हाल...

मौसम विभाग के मुताबिक एक ठिन निम्नदाब के क्षेत्र उत्तर बंगाल के खाड़ी के उपर बने हे अउ एखरे संगेसंग उपरी हवा के चक्रवाती घेरा घलो बने हे। अवइया चौबीस घंटा म ए ह निम्नदाब के क्षेत्र म बदले के संभावना हे। जेखर असर ले काली प्रदेश के कतकोन जघा म हल्का ले मध्यम बरसा होय के संभावना हे। उहें, मध्य छत्तीसगढ़ के जिला मन म भारी ले अतिभारी बरसा अउ गाज गिरे के चेतावनी दे गेहे।
